

[1] Hodiernō diē nōn tantum meō beneficiō mihi vacō, sed spectāculī, quod omnēs molestōs ad sphaeromachiān āvocāvit. Nēmō inrumpet, nēmō cōgitātiōnem meam inpediet, quae hāc ipsā fiduciā prōcēdit audācius. Nōn crepābit subinde ōstium, nōn adlevābitur vēlum: licēbit tūtō vādere, quod magis necessārium est per sē euntī et suam sequentī viam. Nōn ergō sequor priōrēs? Faciō, sed permittō mihi et invenire aliquid et mūtāre et relinquere; nōn serviō illis, sed assentior.

[2] Magnum tamen verbum dīxī, quī mihi silentium prōmittēbam et sine interpellātōre sēcrētum: ecce ingēns clāmōr ex stadiō perfertur et mē nōn excutit mihi, sed in hūius ipsius rei contemplātiōnem trānsfert. Cōgitō mēcum, quam multī corpora exerceant, ingenia quam paucī; quantus ad spectāculum nōn fidēle et lūsōrium fiat concursus, quanta sit circā artēs bonās sōlitūdo; quam inbecillī animō sint, quōrum lacertōs umerōsque mīrāmur.

[3] Illud māximē revolvō mēcum: sī corpus perdūcī exercitātiōne ad hanc patientiam potest, quā et pūgnōs pariter et calcēs nōn ūnīus hominis ferat, quā sōlem ardentissimum in ferventissimō pulvere sustinēns aliquis et sanguine suō madēns diem dūcat, quantō facilius animus conrōborārī possit, ut fortūnae ictūs invictus excipiat, ut prōiectus, ut conculcātus exsurgat. Corpus enim multīs eget rēbus, ut valeat: animus ex sē crēscit, sē ipse alit, sē exercet. Illis multō cibō, multa pōtiōne opus est, multō oleō, longā denique operā: tibi continget virtus sine apparatu, sine impensa. Quidquid facere tē potest bonum, tēcum est.

[4] Quid tibi opus est, ut sis bonus? Velle. Quid autem melius potes velle quam ēripere tē huic servitūtī, quae omnēs premit, quam mancipia quoque condiciōnis extrēmae et in hīs sordibus nāta omnī modō exuere cōnantur? Pecūlium suum, quod comparāvērunt ventre fraudātō, prō capite numerant: tū nōn concupiscēs quantūcumque ad libertātem pervenire, quī tē in illā putās nātum?

[5] Quid ad arcam tuam respicis? Emī nōn potest. Itaque in tabellās vānum cōicitur nōmen libertātis, quam nec, quī emērunt, habent nec, quī vendidērunt: tibi dēs oportet istud bonum, ā tē petās. Līberā tē prīmum metū mortis (illa nōbīs iugum inpōnit), deinde metū paupertātis.

[6] Sī vīs scīre, quam nihil in illā malī sit, comparā inter sē pauperum et dīvitum vultūs: saepius pauper et fidēlius rīdet; nūlla sollicitūdō in altō est; etiam sī qua incidit cūra, velut nūbēs levis trānsit: hōrum, quī fēlicēs vocantur, hilaritās ficta est aut gravis et suppūrāta trīstitia, eō quidem gravior, quia interdum nōn licet palam esse miserōs, sed inter aerumnās cor ipsum exedentēs necesse est agere fēlicem.

[7] Saepius hōc exemplō mihi ūtendum est, nec enim ūllō efficacius exprimitur hic hūmānae vītae mimus, quī nōbīs partēs, quās male agāmus, adsīgnat. Ille quī in scaenā lātus incēdit et haec resupīnus dīcit,

Ēn īmperō Argīs; régna mihi līquīt Pelops,
quā póntō ab Hellēs .átque ab Iōnió marī
urgvētur Isthmos,

servus est, quīnque modiōs accipit et quīnque dēnāriōs. [8] Ille quī superbus atque inpotēns et fiduciā vīrium tumidus ait,

Quod nísi quiēris, Ménelāe, hāc dextrā óccidēs,

diurnum accipit, in centunculō dormit. Idem dē istīs licet omnibus dīcās, quōs suprā capita hominum suprāque turbam dēlicātōs lectīca suspendit: omnium istōrum personāta fēlicitās est. Contemnēs illōs, sī dēspoliāveris.

[9] Equum emptūrus solvī iubēs strātum, dētrahis vestīmenta vēnālibus, nē qua vitia corporis lateant: hominem involūtum aestimās? Mangōnēs, quidquid est quod displiceat, id aliquō lēnōciniō abscondunt, itaque ementibus ōrnāmenta ipsa suspecta sunt: sīve crūs alligātum sīve brachium aspicerēs, nūdārī iubērēs et ipsum tibi corpus ostendī.

[10] Vidēs illum Scythiae Sarmatiaeve rēgem īnsīgnī capitis decōrum? Sī vīs illum aestimāre tōtumque scīre, quālis sit, fasciam solve: multum malī sub illā latet. Quid dē aliīs loquor? Sī perpendere tē volēs, sēpōne pecūniam, domum, dīgnitātem, intus tē ipse cōnsiderā: nunc quālis sīs, aliīs crēdis. Valē.